

唐丞相曲江張先生文集

唐丞相曲江張先生文集卷之六

制書

南郊赦書

東封赦書

后土赦書

籍田赦書

南郊赦書

門下朕獲主三靈于今一紀聽政中是每不敢康觀
書一夜將求諸道而頃年已來每思至理或遠人勿
率或嗣歲不登淳朴未還惕厲斯在爲人上而慙德

奉天明以畏威故祝史正辭必期於陳信郊丘備禮
將俟於昇平今宗廟降靈克開厥後乾坤交泰保合
大和麟鳳龜龍玄符黃瑞之祉蠻夷戎狄梯山航海
之琛莫不日月以聞道路相屬顧惟不德當茲休運
欽若昭報疇咨故實所以今年獻春恭祠后土季秋
吉日追崇九廟採必先於曾經稽肆類於虞典爰因
長至欽謁上玄告受命之元符昭嚴配之成績大典
云備至誠克展諸侯駿奔來於穆之相百神受職率
咸秩之文六變已陳三獻斯畢蓋春秋之大事莫先
乎祀王者之盛禮莫重於郊柴燎克終感慶罔極豈

予一人之福亦爾萬邦之賴宜因咸和之際俾承厚
下之澤可大赦天下嗚呼君臣一體休戚共焉朕欽
承天命躬傳大寶蓋憑累祖餘業得一之符亦由群
公舊勲不二之力永言繫賴其敢忘之自武德已來
實封功臣知政宰輔有身無大故而亡官實封子孫
淪屈者所由勘責具狀以聞存者可籌其官榮逝者
當錄其胤嗣使幽明同慶知有令辰

東封赦書

門下朕聞天監唯后后克奉天既合德以受命亦推
功而復始厥初作者七十二君道治跡著時至符出

皆用事于介立升中於上帝人神之望蓋有以塞之
皇王之序固可得而言之朕接統千歲承光五葉惟
祖宗之德在人惟天地之靈作主往有內難幽贊而
集大勲間無外虞守成而繼舊服未嘗不乾乾終日
思與公卿大夫上下叶心聿求至理引我烈聖其庶
平馨香今九有大寧群氓樂業時必敬授而不奪物
亦順成而無夭懋建皇極幸致大和聚乃幽遐率由
咸被戎狄不軌唯文告而來庭鱗鳳已臻將覽悟而
在藪以故凡百執事亟言大封顧惟不德初欲勿議
伏以先聖儲祉與天同功荷傳符以在今敢侑神而

無報大節斯在朕何讓焉遂奉遵高祖太宗之業憲
章乾符之典時邁東土柴告岱宗精意上達朕嚮來
應信宿行事雲物呈祥登降之禮斯畢嚴配之誠獲
展百神群望莫不懷柔四方諸侯莫不來慶斯事天
下之介福邦家之耿光也無窮之休祉豈獨在予非
常之惠澤宜其逮下可大赦天下朕躬陟天門宿齋
日觀時屬嚴冬雪候初夜風寒朕因露立祈恩誓欲
代人當咎俯仰之際頓首霜威莫獻之辰變同韶景
誠荷上天垂祐亦賴靈山吐祥詩云無德不報宜封
太山神爲天齊王禮秩加三公一等宜令所管崇飾

祠廟環山十里禁其採樵給近山二十戶復以奉神祠率土之內賜酺七日任於村坊宴樂不得褻飲煩勞其節文有未露及者所司比類奏聞其封祀有數處行事者從一處叙赦書日行五百里主者施行

后土赦書

門下昔者巡狩所至柴瘞斯者蓋取誠享以遵告類朕恭承祖宗之烈獲主神祇之祀夙夜祇畏不敢荒寧故勒兵朔陸先展義於汾社迴旆睢上遂有事於郊壇王者父事天母事地則漢氏祈穀未始正名周禮降神乃爲徽福而已朕以天命之重子道爲先惟

茲精神在乎敦孝庶蒙福於四海斯永康於兆人是
以率由舊章敬恭明祀嚴配之誠既展奠獻之禮又
終且春秋之議大事若祀齋祭之福庶品維祺豈獨
在予而共有斯慶可大赦天下

籍田赦書

門下昔者受命爲君體元立極未有不謹於禮而能
見教於人朕其庶乎有勲作者方冊存而可舉舊章
絕而復尋自古所行無一而廢將以上乞靈於宗社
下蒙福於黎元朕茲精誠天實降鑒今嗣歲初吉農
事將起禮有先於耕籍義緣奉於粢盛是所嚴祗敢

不敬事故躬載耒耜親率公卿以先萬姓遂終千畝
謂敦本之爲小何布澤之更深宜有順於發生俾無
偏於行惠可大赦天下宗廟致享務在豐潔禮經公
革必本人情遵豆之薦或未能備物服制之紀或有
所未通宜令禮官學士詳議具奏朕自臨天下一紀
于茲不敢荒寧日加兢業而災眚未弭黎人未康若
有由而然則在予之責有能直言極諫者具以狀聞
每渴賢良無忘監寐頃雖虛佇未副旁求其才有王
霸之畧學究天人之際智勇堪將帥之選政能當牧
宰之舉者五品已上清官將軍都督刺史各舉一人

孝悌力田鄉閭推挹者本州長官勘責有才堪應務者各以名聞致仕官久歷清資始終稱著年漸老邁情有可矜量與改職依前致仕宗子中有才行著聞比尚沉屈者委宗正勘實奏聞唐元兩營立功官任折衝並改與即將改與中郎其亡官失爵量加收叙五岳四瀆名山大川及自古聖帝明王忠臣良相並令所在長官以禮致祭赦著有所夫該者所司比類奏聞亡命山澤挾藏軍器百日不首復罪如初敢以赦前事相言告者以其罪罪之都城內賜酺三日布告遐邇咸使知聞

唐丞相曲江張先生文集卷之六

唐丞相曲江張先生文集卷之七

勅制

勅皇太子納妃

勅處分十道朝集使

勅處分十道使

勅處分朝集使

勅處分十道使

勅歲初處分

勅令禮部掌責人

勅幸西京

勅置十道使

勅授十道使

勅停官祭贈太子

勅處分縣令

勅處分縣令

勅處分選人

勅議放私鑄錢

勅處分宴朔方將

勅宴幽州老人

勅慮囚

勅擇日告廟

籍田制

諸王實封制

貶韓洪州刺史制

廢王皇后制

停張說中書令制

勅處分舉人

勅皇太子納妃

勅禮有謹於初義亦重其本凡是姻媾且猶正於人倫況在元良更將承於宗祀皇太子鴻儲副是屬仁孝自然爰從吉辰式備嘉禮上事下繼君子重之言告言歸朕豈無慰非獨在予之慶宜申與衆之澤應

天下囚徒死罪特宜免死配流嶺南遠處流罪降至
徒徒已下罪並宜釋放其造偽不首勾合知情受偽
人等罪雖徒流仍便隸爲百姓至彼勿許東西諸道
征行人家及鰥寡憚獨委州縣長官檢校矜放差科
使安其業中間有不支濟者量事賑給仍量助其營
種長安萬年兩縣百姓及今月當上曠騎衛士雜匠
掌閑幕士駕士工人樂人供膳主膳官馬主食弓等
並免其家今年地稅三衛細引飛騎萬騎監門長上
及禮生有職掌者各減一年勞在京文武官九品已
上見在京外官因公使及當上在京新除五品已上

外官未辭并致仕官朝朔望者各賜勲一轉東宮官
九品已上諸司緣禮會祇供官等更加勲一轉五禮
使兵部尚書兼中書令蕭嵩特封徐國公禮會使黃
門侍郎同中書門下平章事韓休特與三品妃禮會
使少府監馮紹正賜紫金魚袋諸副使及判官更加
勲一轉禮官儋者夾侍官及孔目官使典主旌節等
選日優與處分仗內馬家內侍省給使教坊音聲人
緣太子禮會祇供者各賜勲一轉皇太子舅尚輦奉
御趙迥進特與三品仍改三品官前右武衛騎曹趙
迥進特與五品仍改與五品官皇太子侍讀侍書等

各加一階皇太子諭德潘蕭特與五品太子妃兄通
事舍人薛愿特與五品仍改與五品官兄吏部常選
特與五品仍與六品官今日應預會官等各節級給
賜物即宜領取宴慰者所以宣其情頒錫者所以將
其意公卿百辟庶知朕心

勅處分十道朝集使

勅朝集使等朕恭已承天守文繼位布一心於兆庶
明四目於萬方恒恐道或未周物不遂性旁求俊乂
共理黎元于茲群辟寧不我副凡今政要畧有四端
衣食本於桑農禮義興於學校流亾出於不足爭訟

由於無耻故先王務其三時將以厚生也修其五教
將以惇俗也有國有家同知此議不患不知患在不
行爾且長吏數改政教屢移在官當先爲國理人各
揚其職不當冒榮干進苟利其身澆俗不可不革淳
風不可不長近令刺史在任四考方遷實欲始終其
情黜陟斯繫必若縣得良宰萬戶息肩州有賢牧千
里解帶仁政不遜行之則是皆能勵節朕復何有且
如浮逃客戶所在安輯征鎮人家每事憂恤倉儲唯
實賦役唯均鰥寡撫存盜賊禁止郵驛無弊姦訛不
生念茲八事朕常屢懇嗟爾庶尹可不用心卿等還